

ORGANISAZION PAT

## Mendranzes: no l'é più l Servije

*Con delibera de la Jonta provinzièla la competenza su la mendranzes é passèda da n Servije, descheche l'é pervèdù te la LP 6/2008 su la mendranzes a na »Unità di missione semplice«*

Col prum de mèrz, o miec coi 2, ajache l prum l'era de domenia, l'é peà via n nef endrez te la strutture de la Provincia Autonoma de Trent. L mudament, decidù con desvaliva deliberes de la Jonta del president Maurizio Fugatti, é peà via da l'an passà e l'à abù desche ultim at la deliberes di 7, di 21 e di 27 de firé de chest an. Con chesta deliberes l'é stat mudà la lege del personal de la provinzia (L.P. nr 7 dai 3 de oril

del 1997) e l'é stat decidù desvaliva novitèdes en cont de Servijes e Ofizies de la Provinzia.

Anter dut l rest, chel che revèrda più da vejìn i ladins l'é l mudament del Servije mendranzes, che dal scomenz de mèrz no l'é più, apontin, n Servije, ma l'é doventà na »Unità di missione semplice«.

Chesta neva formula perveit doi sorts de Unità de Miscion: una »Strategica« e una »Semplice« che é states metudes te la LP 7/97 con l'articol 12 quinquies.

Dal prum de mèrz donca l Servije mendranzes linguistiches, gregn evenc e relaziions esternes, con sia dirigenta Marilena Defrancesco, l'é doventà demò Servije gregn evenc e relaziions esternes, e la competenza en cont de mendranzes é passèda a na Unità de Miscion Scempia, più avisa a »Umse affari istituzionali e audit« doventèda cosci »Umse minoranze linguistiche locali e audit europeo«, con a cef la dirigenta d.ra Giuliana Cristoforetti.

Che vevel dir chest a nivel concret per la mendranzes? Al moment no se sà amò avisa, ai 2 de mèrz ti ofizies de chel che l'era l Servije Mendranzes

no l'era amò ruà nesciuna comunicazion ofiziala. No se sà se la trei persones che te chest moment laora te chisc ofizies, che l'é Paola Gualtieri, Giuliana Mazzalai e Cristina de Tisi, e che les se cruzia de duta la pratighes e i bilanzes del Fondo per la mendranzes, di problemes giuridics leé a la mendranzes e de la gestion de la comunicazion e del sit, les restarà dutes trei a sia encèria, o se les vegnarà destinèdes utró; se l'organich che se cruzia de mendranzes, e che jà ades l'é sot dimensionà, l vegnarà amò smendrà (jai egn te chest Servije lurèa 5 persones) o se enveze magari l vegnarà smaorà. Ampò l'é vèlch cruzie ti ambienc più vejins a la costions che revèrda la mendranzes, no demò ladins ma ence mochegn e cimbres, ajache l passaje da Servije a Umse vegn conscidrà n vèrech endò tel stravardament de la mendranzes. I dubies vegn ence per l fat che l'istituzion de n Servije per la mendranzes é pervèdù a na vida spezifica te l'art. 11 de la Lege Provinzièla nr 6 del 2008 su la mendranzes: enlouta l'era stat na bona batalia acioche per la mendranzes vegnisse pervèdù n Servije, più struturà e de nivel maor che demò n Ofize, coche l'era stat proponet al scomenz. Donca per passèr la competenza de la mendranzes da n Servije a na Unità de Miscion Scempia fazile se cognessa perverder l mudament ence te chesta lege e fossa stat benfat che chest passaje vegne deschiari e controlà dai referenc politics di raions de mendranza.



L. Palaz de la Provinzia de Trent.

Lucia Gross